

UN AN DI LOTE CENCE PADIN

Cun chest numar "Patrie dal Friûl" e finìs un an di vite. Di vite? Un an di lote cence padin, pitost.

Ma chest sfuei al è nassût cun chel intindiment: di fâ vuere aes cjacaris e ai cjacarons, di spacâ il polvar ai biâts indurmidîts, di scjassà la aghe tal stomi ai furbons che vuelin leâ il mus indulà che ur torne cont, di doprâ il mani de scove cui gramolons di fûr vie che si son fate la tane in cjase nestre, intant che miârs dai nestrìs a strissinin il baûl pes stradis dal mont.

Si sa che o vin pescjade la code a tancj di lôr, che o vin stiçât il vues rabiôs a putrops, che o vin disturbât il rumi a cualchi altri. E ancjemò o vin puartât scandul, cul nestri lengaç crût e garp a une vorute di animutis timoradis e sglonfis di retoriche nazionaliste o di batude unitarie.

Ma indi vino sbaliadis tropis? Tropis voltis i fats nus àno dât tuart? Tropis voltis vino scugnût mudâ sunade?

Il lengaç che o doprin in chest numar al è chel istès - tâl e cuâl - che o vin doprât tal prin. Pe nestre strade o vin cjaminât drets: cun pocje diplomazie, ma cun dute scletece. O vin vude di smire une sole robe: l'interès dai furlans, cuintri di ducj chei che, sot di cualuncue bandiere e in non di cualuncue idee, a cirin di fâsi strade a spesis dai dordei.

Si vin fats une vorute di nimîs, ma ancje une vore di amîs cjalts e sigûrs. In zornade di vuê, trê parts dal sfuei a son fatìs dai nestrìs amîs, si ben che o vin simpri butade inte scovacere un grum di colaborazion che no nus semeave.

O vin mostrât, in pratiche, che la nestre lenghe e va ben par tratâ cualuncue cuestion e no dome par contâ fufignis o par imbastî vilotìs. Su chest cont o vin ancjemò strade di fâ, e chê che o vin fate nus à costât avonde sudôr: ma se i furlans di juste raze nus judin, nus consein e nus sburtin, o sperìn di fermâ l'imbastardâmint de lenghe furlane.

Tiradis lis sumis, no vin nuie tal tacuin, o vin sacrificât un grum di timp, di sium, di pazienze e di fiât, o vin trascurade la profession e i nestrìs interès, ma o podìn freâsi lis mans e dî: Alo indenant!

pre Bepo - Patrie dal Friûl / 1947